



S'ei un bon escambi entà tu, ei un bon cambi entà jo.

Enmiei d'un camp fòrça gran mès a on non creishie jamès arren entà minjar, i auie ua caseta a on non auien jamès arren tà codinar.

Ena casa i viuien ua mair-sénher e un pair-sénher fòrça praubi, que non auien arren d'arren era soleta causa qu'auien ère era soleta causa que non auien de besonh: un shivau !

Atau qu'un dia sa mair-sénher didec:

- Escota, pare, e se te'n vas tath mercat e càmbies eth shivau per quauquarren que mos sigue mès avient?
- E coma saberè per quina causa è de cambiar eth shivau ?

E mare li responèc: S'ei un bon escambi entà tu, ei un bon cambi entà jo.

Atau que pair-sénher cuelhec eth shivau e anin-anan, comencèren de tirar de cap tath mercat enquia qu'enteneren ua vaca.

Peth camin, dauant sòn, un pagés amiaue tath mercat ua vaca plan gròssa d'aqueres que hèn tanta lèit! e pare pensèc: "Ja sai qu'eth shivau ei mès gròs e mès car qu'ua vaca, mès damb era vaca auríem lèit cada dia entà hèr boni hormatges!. Mmm!"

Atau que didec ar amo dera vaca:

- Ja sabi qu'eth shivau ei mès gròs e mès car qu'ua vaca, mès t'ac cambiarè de bon grat: s'ei un bon escambi entà tu, ei un bon escambi entà jo.

Ath pagés li semblèc perfècte. Li dèc era vaca e se'n portèc eth shivau de pare.

" E se non è hèt un bon cambi?" -pensèc pare- e decidic de contunhar en tot anar de cap tath mercat entà veir se trapaue quauquarren de mielhor, e siguec alavetz qu'entenec ua oelha ...

E pare pensèc: "Ja sè qu'era vaca ei mès gròssa e mès ben pagada qu'ua oelha. Mès dera lèit dera oelha tanben en gessen boni hormatges, e, ath delà, mos pòt dar lan entar iuèrn! atau que se càmbii era vaca per ua oelha, encara i gesserè mès ben parat!"

Ath cap d'un moment ja auie escambiat era vaca pera oelha, e encara li amorassaue era lan entà veir coma ère de gròssa! e de doça! quan entenec que s'apropauè un son que hège mès o mens atau:

- Quac, quac!

E ac endonvièc ath moment: ère ua auca! e pensèc: "Es auques non dan lèit ne lan mès damb es sues plumes, doces e delicades, poiriem hèr-mos un coishin e un nòrdic ben leugèr !, entà caperar-mos plan es heiredes nets d'iuèrn ! Ara mia hemna li shautarie plan auer ua auca !

E sense pensar-s'ac ne un segon de mès, pare prepausèc ar auquièr de hèr un escambi entre era oelha e era auca.

Er auquièr li didec qu'òc e heren era tròca. Mès coma que pare non ère deth tot segur d'auer hèt un bon tracte, contunhèc marchant de cap tath mercat damb aquera auca, enquia que, en arribar entenec un cocorococ !! que lo hec a dubtar un aute viatge.

"Ua garia ei lèu çò de madeish qu'ua auca, donques que tanben a plumes e bona carn! e se'n hè un bon caldo !, mès ei que, ath delà!, ua garia mos ponerie ueus cada dia, e en tot tíer compde que fòrça dies non auem arren entà minjar ua garia mos conven fòrça mès qu'ua auca!"

E dit e hèt, cambièc era auca pera garia mès content qu'ua guitarra!

Mès pare, coma que ja ère as pòrtes deth mercat, decidic hèr-i un torn entà passejar enter es paradetes e flairar-ne es aulors ! e quina aulor que flairèc! ...

- D'a on ven aguesta flaira tan bona de pomes? -demanèc pare.

E un fraire li responec:

- D'aguest sac de pomes poirides que sauvam entàs porcèths!
- Un sac de pomes poirides! era mia hemna ditz qu'es pomes poirides atiren bon astre!
- ... te la càmbii per aguesta garia !
- A, a, a, a, a! ... vòs cambiar ua garia per un sac de pomes poirides? era tua hemna non harà pas sauts de contenta, non Çò que harà ei escridassar-te!
- Ei que non è pas gessut de casa entà escambiar ua garia senon entà escambiar un shivau.

Alavetz un senhor fòrça gras e fòrça ric li didec:

- S'era tua hemna non te rebotegue pas, te darè un sac plen de monedes.

Pare acceptèc era prepausa e tota era comitua lo seguic enquia casa sua, a on sa mair-sénher ja demoraue.

- Ja auie talents que tornèsses entà saber ce qué t'an dat a cambi deth shivau.

Pare li expliquèc que l'auie cambiat per ua vaca, e mare se metec fòrça contenta, entà pr'mor que atau aurien hormatge. Mès alavetz pare li didec que dempús auie cambiat era vaca per ua oelha ...

E mare didec:

- Que ben! Atau, ath delà de hormatge, auram lan!

Mès ara seguida auie cambiat era oelha per ua auca entà auer plumes! e dempús l'auie cambiada per ua garia ponedora entà auer ueus, e ara fin l'auie cambiada per un sac de pomes poirides!

E mare li didec:

- As hèt eth miellhor cambi de toti: aguest an eth pomèr non a hèt n'era poma que hec

aguest an passat totun, ara arribes damb un sac plen de pomes poirides ! açò vò díder qu'aguest an es causes mos anaràn fòrça ben!

E lo aumplic de punets!

Dempús, ben segur, tament coma auie prometut er òme ric e gròs deth mercat, les aumplic de monèdes tantes monedes! que pare e mare poderen crompar-se ua garia, ua auca, ua oelha, ua vaca e eth sòn antic shivau!

Guion: Jaume Esquiús

- 
- 
- Amb el suport de 

© CCRTV Interactiva, S.A. | Televisió de Catalunya, S.A.

- [Avís legal](#) |
- [Segell de qualitat](#) |
- [Contacta 5480](#) |
- - [Idiomes](#)
 - [Català](#)
 - [Castellano](#)
 - [English](#)